



Era l'Uniun purila svizra renda attent sin ils problems ch'il littering chaschuna a l'agricultura.

FOTO DAVOSER ZEITUNG

Littering – ina nauscha disa

Rument sco gronda calamitad per l'agricultura e per il turissem

MARTIN CABALZAR/FMR

■ **Sut littering chapeschan ins la nauscha disa da laschar star ni da bittar davent pitschens quantums da rument en il spazi public ed en la natira. Cunzunt per l'agricultura ed il turissem è quai ina nauscha calamitad che chaschuna er gronds custs al maun public.**

Deplorablamain datti adina dapli persunas che laschan star ni bittan davent rument pitschen sco buttiglias e dosas vidas, restanzas da mangiativas, material da pachetadi, schlogns e stumbels da cigarettes etc. Saja quai sin spassegiadas en la natira, turas da muntogna, viadis cun l'auto, avant stizuns ed ustarias, pausadis, fermadas da posta, staziuns dal tren u piazzas da campar, da giu e da picnic. D'attribuir è quella calamitad cunzunt er a la midada da las tenutas e disas da consumar e sa nutrir, sco era ad in nov comportament en il temp liber. Adina dapli vegn l'agricultura dentant er confruntada cun satgs cun excrements da chauns che vegnan bittads en ils prads. Per mantegnair la schubradad dal spazi public ston las vischnancas investir summas considerablas.

In problem virulent per l'agricultura

Actualmain chattan ins qua e là a l'ur da la via placats che rendan attent als problems ch'il littering chaschuna a l'agricultura. «Rument pitschen sco staglias da vaider, buttiglias da PET e dosas d'aluminium ed auter material da pachetadi èn in privel principalmain per ils animals da niz, sch'els pasculeschan sin prads e pastgiras per lung da las vias», di *Martin Renner*, il mainagestiu da l'Uniun purila grischuna. Tal rument sa maschaida cun il fain,

vegn manizza da las maschinas e sa tschenta la finala en il pavel, cun consequenzas gravantas per ils animals. «El po chaschunar inflamaziuns e blessuras, effectuar ch'els animals smagreschan, ston vegnir operads ni crappan schizunt», constatescha *Martin Renner*. Dentant er excrements da chauns e stumbels da cigarettes pon chaschunar disturbis da la sanadad dals animals e schizunt chaschunar aborts. Ina brochuritta intitulada «Stadt und Land – Hand in Hand» renda attent a la problematica e dat tips d'agir.

Er il turissem patescha

En ina incumbensa sustegnida da 33 collegas punctuescha il deputà *Ursin Widmer* (PBD Favugn) l'impurtanza d'in ambient proper e net per il turissem: «In dals motifs che vegn numnà il pli savens per far vacanzas en il Grischun è la natira intacta ed in ambient proper e net», di *Widmer*. Cun lur incumbensa vulan ils moziunaris incumbensar la regenza da far in'analisa dal stadi actual e da proponer mesiras pussaivlas per infurmar e sensibilisar meglier la populaziun per la problematica dal littering. Plinavant duai vegnir examinà, sch'i dovra ina nova basa legala per chastiar quels che surpassan las prescripziuns. La finala duai la regenza suttemetter al Cussegl grond in concept chantunal davart la prevenziun e reduziun dal littering. Sco che l'Uffizi federal da l'ambient ha punctuà envers la FMR èn numnadamain ils chantuns, las citads e las vischnancas responsabels per la nettezza dal spazi public.

La regenza relativescha

Per il Grischun na vul la regenza betg dramatisar la situaziun, acut saja il pro-

blem sulettamain en l'agricultura. Periclitads spezialmain sajan animals da niz ed en ina dimensiun restrenschida era animals selvadis. «Rument pitschen bittà davent, dentant cunzunt excrements da chauns, pon smerdar l'erva e vegnir en il pavel, cun la consequenza ch'i dat in pli grond dumber d'aborts infectus chaschunads da parassits», constata la regenza, «sco quai ch'i resorta dentant d'ina retschertga fatga dal Forum da giuvenils dal Grischun tar las autoritads communalas n'è il littering dentant betg in problem acut che stuess vegnir preni a mauns cun prioritad.» Unicamain en l'agricultura saja il bagegn d'agir avant maun.

Tenor la regenza duai la populaziun vegnir sensibilisada per la problematica dal littering il meglier sur las scolas. Per quest intent sajan ins actualmain vidlonder d'installar in post spezialisà per l'educaziun ambientala en la scola auta da pedagogia. Sin plaun chantunal existia er gia la pussaivladad da chastiar surpassaments dal littering, la persecuziun penala saja dentant chausa da las vischnancas. «In concept chantunal unitar per prevegnir al littering n'è actualmain betg necessari», scriva la regenza. Tenor ella po il littering e sias consequenzas vegnir cumbattì effizientamain cun ils instruments existents: promover l'educaziun ambientala solida en las scolas, proteger ils animals cun engaschar rangers che rendan attent passants als privels dal littering. La regenza è dentant pronta da far in'enquista online tar las vischnancas e tar ils purs pertutgads. En quest senn vul la regenza acceptar mo parzialmain l'incumbensa dad *Ursin Widmer*.